



Mrejeshaji

Na watu wako watapajenga mahali palipokuwa ukiwa; utaiinua misingi ya vizazi vingi; nawe utaitwa, Mwenye kutengeneza mahali palipobomoka; na, Mwenye kurejeza njia za kukalia. —Isaya 58:12.

Mwana wa Mungu alikuja duniani kama mrejeshaji. Yeye alikuwa ndiye Njia, Kweli na Uzima. Kila neno alilolitamka lilikuwa ni roho na uzima. Alinena kwa mamlaka, akiwa na utambuzi wa uwezo Wake wa kubariki wanadamu, na kukomboa matêka waliofungwa na Shetani; akiwa na utambuzi pia kwamba kwa kuwepo Kwake angeiletea dunia ukamilifu wa furaha. Alitamani kumsaidia kila mwanafamilia wa kibinadamu aliyekandamizwa na kuteseka, na kuonesha kwamba ilikuwa ndiyo ridhaa Yake kubariki, na wala sio kuhukumu.

Kitendo cha Kristo kufanya matendo ya Mungu hakikuwa cha kupora; kwani hii ndiyo sababu iliyomleta kuitimiza kutoka mbinguni, na kwa sababu hii, hazina za milele zilikuwa chini ya mamlaka Yake. Katika mamlaka ya karama Zake hakuna aliyekuwa anamdhibiti. Aliwapita waliojiinua nafsi, walioheshimiwa na waliokuwa matajiri, kisha akajichanganya na maskini na waliokandamizwa, akileta maishani mwao nuru, matumaini na shauku ambayo walikuwa hawajapata kuwa nayo kamwe. Alitamka baraka kwa wote waliokuwa wakiteseka kwa ajili Yake, akisema: “Heri ninyi watakapowashutumu na kuwaudhi na kuwanenea kila neno baya kwa uongo, kwa ajili yangu.”

Kwa namna iliyo wazi, Kristo alitwaa kwa ajili Yake, haki ya mamlaka na utii. Alisema, “Ninyi mwaniita, Mwalimu, na, Bwana; nanyi mwanena vema, maana ndivyo nilivyo.” “Wala msiitwe viongozi; maana kiongozi wenu ni mmoja, naye ndiye Kristo.” Kwa namna hiyo alidumisha heshima ambayo ilikuwa kwa ajili ya jina Lake, na mamlaka na uwezo aliokuwa nao mbinguni.

Kulikuwa na nyakati ambapo alinena kwa heshima ya ukuu Wake mwenyewe ulio wa kweli. Alisema, “Mwenye masikio, na asikie.” Katika maneno haya alikuwa akikariri agizo la Mungu, ambapo kutoka katika utukufu Wake Usio na mwisho alitamka, “Huyu ni Mwanangu, mpendwa wangu, ninayependezwa naye; msikieni yeye.” Akisimama kati ya Mafarisayo wenye chuki, waliotafuta kufanya umuhimu wao wenyewe ndio uhisike, Kristo hakusita kujilinganisha Mwenyewe na watu waliokuwa wawakilishi maarufu zaidi waliowahi kuishi duniani, na kudai kuwa bora zaidi yao wote.

Yona alikuwa mmoja kati ya watu hao, aliyefikiriwa na taifa la Kiyahudi kuwa ni mtu wa hadhi ya juu sana....Kristo alivyokumbusha akili za wasikilizaji Wake, ujumbe wa Yona na utumishi wake katika kuokoa watu, Yeye alisema: “Watu wa Ninawi watasimama siku ya hukumu pamoja na watu wa kizazi hiki, nao watawahukumu kuwa wamekosa; kwa sababu wao walitubu kwa mahubiri ya Yona; na hapa yupo aliye mkuu kuliko Yona.”

Kristo alijua kwamba Waisraeli walimwona Sulemani kama mfalme aliyekuwa mkuu kuliko wote waliowahi kutawala katika falme za kidunia... Licha ya hivyo Kristo alisema: “hapa yupo aliye mkuu kuliko Sulemani” (Youth’s Instructor, Septemba 23, 1897).